

陳子昂集校注

彭慶生 校注

下冊

黃山書社

陳子昂集校注

彭慶生 校注

下冊

黃山書社

2011—2020年國家古籍整理出版規劃項目  
國家古籍整理出版專項經費資助項目  
安徽省“十二五”重點圖書出版規劃項目

# 陳子昂集校注卷七

雜著

## 上大周受命頌表天授元年<sup>①</sup>

臣子昂言：臣聞昔周道昌而頌聲作<sup>〔二〕</sup>，遂能昭配天地<sup>〔三〕</sup>，光烈祖宗，垂之無窮，永爲代典<sup>〔四〕</sup>。伏惟聖神皇帝陛下<sup>②</sup>，闡玄極<sup>〔五〕</sup>，昇紫圖<sup>〔六〕</sup>，光有唐基，以啓周室，不改舊物<sup>〔七〕</sup>，天下惟新<sup>〔八〕</sup>，皇王已來<sup>〔九〕</sup>，未嘗覩也。臣聞仲尼曰：『聖人，丘不得而見之矣。』<sup>〔一〇〕</sup>又曰：『舜禹之有天下，丘不預也。』<sup>〔一一〕</sup>又曰：『鳳鳥不至，河不出圖，丘已矣夫。』<sup>〔一二〕</sup>！皆傷不得見大道之行而鬱悒也<sup>〔一三〕</sup>。臣草鄙愚陋<sup>③</sup>，生長休明<sup>〔一四〕</sup>，親逢聖人，又覩昌運，舜禹之政，河洛之圖<sup>〔一五〕</sup>，悉皆目見，幸亦多矣。今者鳳鳥來<sup>〔一六〕</sup>，赤雀至<sup>〔一七〕</sup>，慶雲見<sup>〔一八〕</sup>，休氣昇<sup>〔一九〕</sup>，大周受命之珍符也。不稽元命<sup>〔二〇〕</sup>，探祕文，採風謠，揮象物<sup>〔二一〕</sup>，紀

天人之會<sup>〔二二〕</sup>，以協頌聲，則臣下之過也<sup>④</sup>。有國彝典<sup>〔二三〕</sup>，其可闕乎？臣不揣朴陋<sup>⑤〔二四〕</sup>，輒獻《神鳳頌》四章，以言大周受命之事，誠未足以潤色鴻業<sup>〔二五〕</sup>，揄揚盛美，亦小臣區區丹慊之至<sup>⑥〔二六〕</sup>。謹輒詣洛城南門奉進<sup>⑦</sup>。塵冒疏冕<sup>〔二七〕</sup>，伏表慚惶<sup>⑧</sup>。

## 校記

- ① 英華卷六一〇題作『進神鳳頌表』，誤，蓋子昂所上《大周受命頌》凡四章，《神鳳》乃其第一章耳。英華題下小字注：『武后。』文尾小字注：『天授元年。』元：弘治本作『九』，形訛，據英華改。
- ② 聖神皇帝：弘治本作『神聖皇帝』，誤，據英華改。參見注〔一〕。
- ③ 草鄙：全唐文卷二〇九作『草野』，義同。
- ④ 過：弘治本作『遇』，形訛，據英華、四庫本、全唐文改。
- ⑤ 朴陋：弘治本作『朴固』，英華作『固陋』，『固』下校：『集作朴。』知宋本作『朴陋』，據改。參見注〔二四〕。
- ⑥ 慊：英華校：『文粹作悃。』按：義同，然今本文粹無此文，不知英華校記何所據。
- ⑦ 謹輒、南門：英華脫『輒』、『門』二字。
- ⑧ 英華文末有『云云』二字。

## 注釋

〔一〕大周受命：《舊唐書·則天皇后紀》：「載初元年九月九日壬午，革唐命，改國號爲周，改元爲天授，大赦天下，賜酺七日。乙酉，加尊號曰聖神皇帝，降皇帝爲皇嗣。」《新唐書·陳子昂傳》：「后既稱皇帝，改號周，子昂上《周受命頌》以媚悅后。」《表》當作於天授元年（六九〇）九月十日前後。

〔二〕頌聲作：歌頌之聲興起。《史記·周本紀》：「（成王）興正禮樂，度制於是改，而民和睦，頌聲興。」西漢揚雄《法言·孝至》：「周康之時，頌聲作乎下。」

〔三〕配天地：能與天地相配，極言其功德之高尚廣大。《易·繫辭上》：「廣大配天地，變通配四時。」

〔四〕代典：即世典，世代之典範。唐避太宗諱改「世」爲「代」。

〔五〕玄極：至道也。唐王勃《平臺祕略贊·貞修》：「道契玄極，芳圖青史。」

〔六〕紫圖：指「天授聖圖」，見卷一《洛城觀酺應制》注〔五〕。

〔七〕舊物：舊日之典章制度。《左傳·哀公元年》：「祀夏配天，不失舊物。」

〔八〕惟新：見卷一《奉和皇帝丘禮撫事述懷應制》注〔二一〕。

〔九〕皇王：指古聖王。《詩·大雅·文王有聲》：「四方攸同，皇王維辟。」毛傳：「皇，大也。」

〔一〇〕「臣聞」三句：語出《論語·述而》：「子曰：『聖人，吾不得而見之矣；得見君子，斯可矣。』」

〔一一〕「舜禹」二句：語出《論語·泰伯》：「子曰：『巍巍乎，舜禹之有天下也，而不與焉。』」與通預，參與也。

〔一二〕「鳳鳥」三句：語出《論語·子罕》：「子曰：『鳳鳥不至，河不出圖，吾已矣夫！』」何晏集解引孔安國曰：「聖人受命則鳳鳥至，河出圖，今天無此瑞。吾已矣夫者，傷不得見也。河圖，八卦是也。」

〔一三〕「皆傷」句：語本《禮記·禮運》：「孔子曰：『大道之行也，與三代之英，丘未之逮也，而有志焉。』」鬱悒：苦悶。

〔一四〕休明：見卷三《爲喬補闕慶武成殿表》注〔二六〕。

〔一五〕河洛之圖：即河圖洛書，見卷三《爲程處弼慶拜洛表》注〔六〕。此借指「天授聖圖」，見卷一《洛城觀醜應制》注〔五〕。

〔一六〕鳳鳥來：《書·益稷》：「簫韶九成，鳳凰來儀。」

〔一七〕朱雀：傳說中之瑞鳥。《藝文類聚》卷九九引《瑞應圖》曰：「朱雀者，王者動作應天時，則銜書來。」

〔一八〕慶雲：即卿雲。見卷二《爲義興公求拜掃表》注〔一六〕。

〔一九〕休氣：祥瑞之氣。東漢班固《白虎通義·封禪》：「陰陽和，萬物序，休氣充塞。」

〔二〇〕元命：見卷一《感遇三十八首》其九注〔一〕。

〔二一〕象物：神靈之物。《周禮·春官·大司樂》：「六變而致象物及天神。」鄭玄注：「象物，有

象在天，所謂四靈者。天地之神，四靈之物，非德至和則不至。《禮運》曰：「何謂四靈？

麟、鳳、龜、龍，謂之四靈。」

〔二二〕天人之會：謂天人合一。見卷二《秋日遇荊州府崔兵曹使讌》注〔九〕。

〔二三〕彝典：常典。南朝梁江淹《蕭相國拜齊王表》：「業不題於宗器，聲靡記於彝典。」

〔二四〕朴陋：同『樸陋』，質樸淺陋。《韓非子·六反》：「寡聞從令，全法之民也，而世少之曰樸陋之民也。」

〔二五〕潤色：增色，增光。《漢書·終軍傳》：「夫天命初定，萬事草創，及臻六合同風，九州共貫，必待明聖潤色，祖業傳於無窮。」

〔二六〕區區：見卷二《爲永昌父老勸追尊忠孝王表》注〔三〇〕。丹慊：見卷三《爲副大總管蘇將軍謝罪表》注〔一七〕。

〔二七〕塵冒：冒犯。旒冕：即冕旒，皇冠也。借指皇帝。



大周受命頌四章并序<sup>①</sup>〔一〕

臣聞大人升階，神物紹至〔二〕，必有非人力所能存者〔三〕。上招飛鳥〔四〕，下動泉魚〔五〕。古之元皇，祇承上帝〔六〕，所以協人祉〔七〕，匹天休〔八〕，卓哉神明，昭格上下〔九〕，莫不以之矣。是故物有可則〔一〇〕，而道有可宗，謂之文獻〔一一〕，其原上也。緬哉有唐，欽崇天命，三祖繼統〔一二〕，品物咸章〔一三〕，玄曆改〔一四〕，元黃瑞〔一五〕，告神皇〔一六〕，出地軸〔一七〕，陟天階〔一八〕，歷軒轅〔一九〕，登太昊〔二〇〕，集乎初始之極，以授我皇〔二一〕。符鳥之肇，開辟元台〔二二〕，女希氏姓〔二三〕，神功大哉，莫不盛於茲日矣。乃察璿璣〔二四〕，稽寶命，發玄讖，升紫圖〔二五〕，則天粲然〔二六〕，皇文炳也。非夫昇光之曜、魄寶之精〔二七〕，其孰能威神皇赫赫若斯者哉？是時三階底平〔二八〕，百揆時序〔二九〕，天下昌矣，玄功溥矣〔三〇〕。西土耆老，欣然來稱曰：『至哉天子，恤我元元〔三一〕，勤勞下都，升聞上帝。臣聞天無二日，土無二王〔三四〕，皇帝嗣武〔三五〕，以主七鬯〔三六〕，豈不宜乎！』神皇窅然〔三七〕，乃登崑崙之臺〔三八〕，修三統〔三九〕，觀五始〔四〇〕，探命曆之紀〔四一〕，則知元氣之所以造也〔四二〕。方採鍾龍，象鳴鳳，協林黃之律〔四三〕，以因生賜姓。九月甲戌朔〔四四〕，六日己卯〔四五〕，神都耆老、遐荒夷貊、緇衣黃冠等萬有二

千餘人<sup>〔四二〕</sup>，雲趨詣闕，請曰：『臣等聞王者受命，必有錫氏<sup>〔四三〕</sup>。軒轅皇帝二十五子，班爲十二姓<sup>〔四四〕</sup>。高陽氏才子二八，命爲十六族<sup>〔四五〕</sup>。《書》云：「祇台德先，不拒朕行<sup>〔四六〕</sup>。」然則聖人起則命曆昌，必有錫氏之規。臣等伏惟陛下受天之符，爲人聖母<sup>〔四七〕</sup>，皇帝仁孝<sup>〔四八〕</sup>，肅恭神明，可以纂武承家，以克永代<sup>〔四九〕</sup>。陛下崇錫類<sup>〔五〇〕</sup>，垂憲章<sup>〔五一〕</sup>，不易日月<sup>〔五二〕</sup>，天人交際<sup>〔五三〕</sup>，斯亦萬代之一時<sup>〔五四〕</sup>。臣等固陋<sup>〔五五〕</sup>，不達大道，敢昧死上聞。』神皇穆然<sup>〔五六〕</sup>，方御珍圖，謙而未許也。越翌日庚辰<sup>〔五七〕</sup>，文武百寮又與耆老夷貊道俗等五萬餘人，守闕固請曰<sup>〔五八〕</sup>：『蓋臣聞聖人則天以王<sup>〔五九〕</sup>，順人以昌<sup>〔六〇〕</sup>。今天命陛下以主，人以陛下爲母。天之丕律<sup>〔六一〕</sup>，元命也<sup>〔六二〕</sup>；人之大猷<sup>〔六三〕</sup>，定姓也。陛下不應天，不順人<sup>〔六四〕</sup>，獨高謙讓之道，無所憲法<sup>〔六五〕</sup>，臣等何所仰則？敬冒昧萬死固請。』是時目踵昆吾<sup>〔六六〕</sup>，有鳳鳥從南方來，歷端門，羣鳥數千蔽之。又有赤雀數百從東方來，羣飛映雲，迴翔紫闥，或止庭樹，有黃雀從之者<sup>〔六七〕</sup>。又有慶雲<sup>〔六八〕</sup>，休光半天<sup>〔六九〕</sup>，傾都畢見，羣臣咸覩。於是衆眈雲萃<sup>〔七〇〕</sup>，囂聲雷動<sup>〔七一〕</sup>，慶天應之如響<sup>〔七二〕</sup>，驚象物其猶神<sup>〔七三〕</sup>，咸曰：『大哉！非至德孰能覩此？昔唐虞之瑞遯聽矣<sup>〔七四〕</sup>，今則見也。天物來<sup>〔七五〕</sup>，聖人革，時哉！況鳳者陽鳥<sup>〔七六〕</sup>，赤雀火精<sup>〔七七〕</sup>，黃雀從之者土也<sup>〔七八〕</sup>，土則火之子<sup>〔七九〕</sup>，子隨母，所以纂母姓，天意如彼，人誠如此，陛下曷可辭之？昔金天鳳凰<sup>〔八〇〕</sup>，鎬京黃鳥<sup>〔八一〕</sup>，

赤氏朱雁〔八二〕，有吳丹鳥〔八三〕，皆紀之金冊〔八四〕，藏之瑞府〔八五〕，以有事也。陛下若遂辭之，是推天而絕人，將何以訓？』於是神皇霈然曰〔八六〕：『俞哉〔八七〕！此亦天授也。』乃命有司〔八八〕，正皇典，恢帝綱，建大周之統曆，革舊唐之遺號，在宥天下〔八九〕，咸與惟新〔九〇〕。賜皇帝姓曰武氏，命爲嗣皇〔九一〕。崇乎紹天統物〔九二〕，其赫胥、大庭之上事已〔九三〕。乃獻頌曰：

天命神鳳，降祚我周〔九四〕。形容有穆〔九五〕，其儀孔休〔九六〕。惟我有周，實保天德〔九七〕。上帝臨命，纂承唐極〔九八〕。人曰天祐〔九九〕，有皇女希〔一〇〇〕。造天立極〔一〇一〕，緬然猷徽〔一〇二〕。赫我皇帝，乃先厥微〔一〇三〕。匪天之命，鳳鳥誰歸？因生錫氏〔一〇四〕，革號循機〔一〇五〕。豈不順乎天而應乎人〔一〇六〕？帝曰俞哉。

右神鳳章

翩翩赤鳥，朱火之光〔一〇七〕。含神之務，祕帝之祥。在昔甲子，降祚于昌〔一〇八〕。今則庚辰〔一〇九〕，翩翩來翔。來翔維何？作我聖皇。提提黃鳥〔一一〇〕，載飛載揚。從火之母，應土之王〔一一一〕。體仁資孝，類我嗣皇。恭膺錫氏，稽首龍章〔一二一〕。天授萬年〔一二三〕，聖帝煌煌。

右赤雀章

崑崙元氣〔一四〕，實生慶雲。大人作矣〔一五〕，五色氤氳〔一六〕。昔在帝媯〔一七〕，南風既薰〔一八〕。叢芳爛漫〔一六〕，郁郁紛紛〔一七〕。曠矣千祀〔一八〕，慶雲來止。玉葉金柯〔一九〕，祚我天子。非我天子，慶雲誰昌？非我聖母〔二〇〕，慶雲誰光？慶雲應矣，周道昌矣〔二四〕。九萬八千〔一八〕，天授皇年。

右慶雲章

周道赫兮天寶開〔二五〕，八方協兮萬國來〔二六〕。天人應兮雷雨作〔二七〕，聲教殷兮宇宙回〔二八〕。璿圖寶兮稱萬歲〔二九〕，神皇穆兮崑崙臺〔三〇〕。

右毗頌章

校記

① 英華卷三三一、全唐詩卷八三錄其《慶雲章》。全唐文卷二〇九錄其序及《神鳳章》，題下無「四章并序」四字。受：弘治本作「授」，古字雖通而今易誤解，據弘治本目錄、嘉靖本、萬曆本、四庫本、全唐文改。

② 泉：四庫本作『潛』，亦通。

③ 軸：弘治本作『輔』，校：『一作軸。』按：『輔』乃『軸』之形訛。四庫本、全唐文皆作『軸』，據改。

④ 王：弘治本作『主』，形訛，據全唐文改。參見注〔三二〕。

⑤ 甲戌：弘治本作『戌申』，萬曆本、四庫本、全唐文作『戌申』，皆誤。檢陳垣《二十史朔閏表》，是年九月甲戌朔。本篇下文云『六日己卯』、『越翌日庚辰』，又《舊唐書·則天皇后紀》：『九月九日壬午，革唐命，改國號爲周。』皆可證九月朔日爲甲戌，傳刻者倒之，又『甲』訛爲『申』，遂成『戌申』矣。然『戌』、『申』皆地支，後人遂改『戌』爲『戊』，故明清諸本多作『戊申』，然是年九月實無『戌申』日也。今改正。

⑥ 六日己卯：弘治本『己卯』下有『朔』字，衍文也，據嘉靖本刪。全唐文作『八日乙卯』，尤誤，蓋臆改『甲戌朔』爲『戊申朔』，故又改『六日己卯』爲『八日乙卯』，以求牽合，殊不知是年九月既無『戌申』日，亦無『乙卯』日也。

⑦ 庚辰：全唐文作『丙辰』，蓋以牽合上文『戊申朔』、『八日乙卯』之訛。按：是年九月無丙辰日，且本文《赤雀章》云：『今則庚辰，翩翩來翔。』《通鑑》卷二〇四：天授元年九月『庚辰，太后可皇帝及羣臣之請。』皆可證事在庚辰，非丙辰也。

⑧ 金天：弘治本作『金琴』，誤，據全唐文改。參見注〔八〇〕。

⑨ 神皇：弘治本脫「神」字，據清道光丁酉蜀州楊國楨刊本《陳子昂先生全集》補，蓋上文之「神皇  
宥然」、「神皇穆然」，皆指武則天也。四庫本作「皇帝」，誤，蓋上文之「皇帝仁孝」，下文之「賜皇帝  
姓曰武氏」，皆指唐睿宗，非武則天也。

⑩ 唐極：全唐文作「皇極」，亦通。

⑪ 祐：弘治本作「古」，校：「一作祐。」四庫本、全唐文皆作「祐」，據改。

⑫ 來翔：弘治本脫此二字，據四庫本補。

⑬ 提提：弘治本作「堤堤」，形訛，據四庫本改。參見注〔一一〇〕。

⑭ 氤氳：英華作「氛氳」，「氛」下校：「集作氤。」義同。

⑮ 帝媯：英華作「媯帝」，校：「集作帝媯。」義同。

⑯ 芳：英華作「兮」，校：「集作芳。」皆通。

⑰ 郁郁：英華作「馘馘」，校：「集作郁郁。」義同。

⑱ 九萬：弘治本作「久九」，嘉靖本作「九九」，皆誤，據英華、全唐詩、四庫本改。

⑲ 八方協兮：弘治本作「八方協公兮」，公、兮二字形近，訛而衍也。據四庫本刪。

注釋

〔一〕本篇亦作於天授元年（六九〇）九月十日前後，說見前篇注〔一〕。

〔二〕大人：猶聖人。升階：登帝位也。《易·升》：「六五，貞吉升階。象曰：貞吉升階，大得志也。」王弼注：「升得尊位，體柔而應，納而不距，任而不專，故得貞吉，升階而尊也。」神物：神靈之物。《易·繫辭上》：「是故天生神物，聖人則之。」紹：繼也。

〔三〕存：達到。《荀子·議兵》：「所存者神，所爲者化。」楊倞注：「存，至也。」

〔四〕飛鳥：指鳳凰、赤雀等神鳥。

〔五〕泉魚：即淵魚，唐避高祖諱改。淵魚呈瑞者，如《宋書·符瑞志上》：「（武王）伐紂，度孟津，中流，白魚躍入王舟。王俯取魚，長三尺，目下有赤文成字，言「紂可伐」。王寫以世字，魚文消。燔魚以告天。」

〔六〕祇承：敬承。《書·大禹謨》：「文命敷於四海，祇承于帝。」

〔七〕祉（止）：福也。

〔八〕天休：見卷三《爲豐國夫人慶皇太子誕表》注〔一〇〕。

〔九〕上下：天地。《書·堯典》：「允恭克讓，光被四表，格于上下。」孔傳：「格，至也。既有四德，又信恭能讓，故其名聞充溢四外，至于天地。」

〔一〇〕則：效法。《禮記·郊特牲》：「天垂象，聖人則之。」

〔一一〕文獻：典籍與賢者。《論語·八佾》：「子曰：『夏禮，吾能言之，杞不足徵也；殷禮，吾能言之，宋不足徵也。文獻不足故也，足則吾能徵之矣。』」朱熹注：「文，典籍也。獻，賢也。」

〔一二〕三祖：指唐太祖、世祖、高祖。《舊唐書·高祖紀》：「皇祖諱虎……武德初，追尊景皇帝，廟號太祖，陵曰永康。皇考諱明……武德初，追尊元皇帝，廟號世祖，陵曰興寧。」又：「貞觀九年五月庚子，高祖大漸……是日崩於太安宮之垂拱前殿，年七十。羣臣上謚曰大武皇帝，廟號高祖。」

〔一三〕品物：見卷三《爲豐國夫人慶皇太子誕表》注〔四〕。

〔一四〕玄曆：即天曆，天之曆數也。《論語·堯曰》：「堯曰：『咨！爾舜！天之曆數在爾躬，允執其中。』」

〔一五〕黃瑞：《文選·揚雄〈劇秦美新〉》：「玄符靈契，黃瑞涌出。」李善注：「黃瑞，黃氣之瑞也。」

〔一六〕神皇：《舊唐書·則天皇后紀》：「垂拱四年五月，皇太后加尊號曰聖母神皇。」

〔一七〕地軸：《北堂書鈔》卷一五七引《河圖括地象》：「崑崙之山，橫爲地軸。」《初學記》卷五引《河圖括地象》：「崑崙者，地之中也。地下有八柱，柱廣十萬里，有三千六百軸，互相牽制。」



〔一八〕天階：星名。《晉書·天文志上》：『又曰三台爲天階，太一躡以上下。』

〔一九〕軒轅：星座名。《史記·天官書》：『南宮朱鳥，權、衡。……權，軒轅。軒轅，黃龍體。前大星，女主象；旁小星，御者後宮屬。』張守節正義：『軒轅十七星，在七星北，黃龍之體，主雷雨之神，後宮之象也。』

〔二〇〕太昊：猶太空。昊，昊天也。

〔二一〕我皇：指武則天。

〔二二〕元台：指三台星之上階二星。《晉書·天文志上》：『三台六星，兩兩而居，起文昌，列抵太微。……上階，上星爲天子，下星爲女主。』

〔二三〕女希：女媧之號。褚少孫補《史記·三皇本紀》：『女媧氏亦風姓，蛇身人首，有神聖之德。代宓犧立，號曰女希氏。』

〔二四〕璿璣：見卷三《爲陳御史上奉和秋景觀競渡詩表》注〔一五〕。

〔二五〕玄讖、紫圖：皆指『天授聖圖』，見卷一《洛城觀酺應制》注〔五〕。

〔二六〕則天：以天爲法，治理天下。《論語·泰伯》：『子曰：「大哉堯之爲君也！巍巍乎唯天爲大，唯堯則之。」』朱熹注：『則，猶準也。』

〔二七〕昇光之曜、魄寶之精：指日月之精華。昇光，初升之太陽。魄寶，月亮也。

〔二八〕三階底平：見卷一《感遇三十八首》其二十九注〔一四〕。